

по мнозех летех воспомяну обет свой великий князь Василей Иванович государь самодержец и прииде на Рязань к великому чудотворцу Николе Заразскому, и торжествовав светло, и заложи чудотворцу церьков и ограду каменну, чтобы чудотворный образ вовеки недвижим, и соверши обет свой.

РЕДАКЦИЯ ХРОНОГРАФИЧЕСКАЯ

Текст по списку БАН 31.6.27

О пришествии Николина образа на Рязань из
Корсуны

В лето 6732-е: Явися святыи великий чудотворец Николае Корсунский в преименитом граде Корсуну служителю своему иерею Еустафию имянем и рече ему великий чудотворец Николае: „Еустафие, возми мой чудотворный образ корсунский, и супругу свою Феодосию, и сына своего Еустафия и гряди в землю Рязанскую. Тамо хошу быти, и чудеса творити, и место прославити“. Еустафие же убося от такаваго сна и видения и нача ужасатися. А во вторую ночь чудотворец Николае тако же ему явися. Иерей же Еустафие вболе в страх вниде и нача помышляти и глаголати: „О великий чудотворец Николае, камо велиши итти? аз раб твой ни земли Рязанския знаю, ни на сердце мое когда възде. Не вам убо тоя земли — на восток ли, или на запад, или на юг, или на север“. И сия в себе помышляя. И в третию ночь явися чудотворец Николае иерею Еустафию, и утыкая его в ребра, веля ему немедленно итти, яко на восток, и поручаяся его допроводити до Рязанския земли. Священник же Еустафие нача трепетен быти от такаго видения, и помысли в сердце своем, како оставити град Корсунь и сродники своя. И мало позамедли, и абие нань нападе болезнь главная. И от тоя болезни ослепе, и нападоша на очи его, яко чешуя. Еустафие же нача скорбети и плакаться, и по мале нача ум свой собирать и каятися — о них же содея. И прилежно припаде к чудотворному образу, и нача плакаться и глаголати: „О великий чудотворец Николае, возвеличанный от господа на небесех и прославленный в чудесах на земли! Согреших пред тобою, владыко, — не послушах твоего повеления. Прости мя грешнаго раба твоего. Буди воля твоя, яко же изволи“. И в той час прозре, и бысть болезнь его главная без болезни, а очи без мозоли, яко же преже. Ерей же Еустафие нача молити всемилостиваго бога, и пречистую его мать, и великаго чудотворца Николу, чтобы ему по чудотворцову изволению получитьи желание свое и дойти уреченнаго места Рязанския земли; уповаше бо на всемилостиваго бога и на пречистую его мать и на великаго чудотворца Николу, яко той может сохранить его от поганых половець. И не збысться мысль его. Великий бо чудотворец Николае явися иерею и Еустафию и рече ему: „Не полезно ти есть итти чрез Половецкую землю, но иди во усть Днепра, и сяди в корабль,